

## **Imaqarniliaq**

Nunat Aqqinik Aalajangiisartut ataatsimiinnerat  
ulloq ataasinngorneq maajip 20-at 2019, nal. 10.00  
Oqaasileriffimmi Nuuk Centerimi.

**Ataatsimiinnermi peqataasut:** Aviâja Rosing Jakobsen, Eva Mätzler, Ono Fleischer.

Oqarasuaatikkut peqataasut: Niels Lorentzen, Johannes Rosing.

**Ataatsimiinnermi peqataatinneqartoq:** Angutinnguaq Olsen.

**Allatsi:** Arnaq B. Johansen.

### **Oqaluuserisassat makkuupput:**

1. Oqaluuserisassat akuerineqarnerat
2. Kingullermik ataatsimiinnermi imaqarniliap akuerineqarnera
  - a. Imaqarniliat akuerisassanngorlugit saqqummiunneqarneri
    1. *februaarip 25-at 2019-mi ataatsimiinnermit imaqarniliaq forretningsordenimut tunngasoq*
    2. *februaarip 25-at 2019-mi ataatsimiinnermit imaqarniliaq – ataatsimiinneq nalinginnaasoq*
3. Siulittaasumit allattoqarfimmillu ilisimatitsissutit
  - a. Strategiliornissamut tunngasunik paasissutissiineq
  - b. Aatsitassanut Aqutsisoqarfimmit saaffiginnissut M-76
  - c. Aatsitassanut Aqutsisoqarfimmit saaffiginnissut M-80
  - d. Aatsitassanut Aqutsisoqarfimmit saaffiginnissut M-82
  - e. NAA allattaat sapaatip akunnerani 15-imi Geodatastyrelsesemiippoq Aalborgimi
4. Ilaasortat siunnersuutaasa suliarineqarnerat
  - a. Ataatsimiinnermit oktoberip tallimaani 2018-imi ingerlanneqartumit imaqarniliamit tigusat
    1. Sannerutip Tasersua (Nassuttooq)
    2. Tasersuattaq (Nassuttooq)
    3. Tasersuattaap Kangiatungaani Aasivissuit (Nassuttooq)
  - b. Ataatsimiinnermit februaarip 25-ani 2019-mi eqqartorneqartut
    1. Kangersertuaq Gletsjer (Tunumi Kangersertuarmi)
    2. Kuuttartorsuasik (Eqalugaarsuit)

3. Taqqaa Nunaa (Saarloq)
4. Akunnaarmiut (Saarloq)
5. Sisussat (Arsuk/Ilorput)
5. Suliatic aalajangiiffigisassat suliarineqarnerat
  - a. Nassuttuumi nunat aqqi nalunaarsukkat nutaat
    1. Qorlortuarsuup Nuua (Qalasiusaliortartoq sarfartuugami)
    2. Qorlortuarsuup Qaqqaa
    3. Kaatorissat Qaqqaat
    4. Paarnat Nuuat
    5. Iggiaa
    6. Eqalummiut Tapersuai
    7. Qorlornera
    8. Tuttut Puungutaat
    9. Qinnguttarfik
    10. Aasivik
    11. Aaggaalip Qaqqaa
  - b. Aasianni nunap aqqa nalunaarsugaq nutaaq
    1. Kussangajaarsuaq
  - c. Savaateqarfiit nalunaarsuutitsinni (genstandsbetegnelseni) illoqarfiit nunaqarfiillu assigalugit inoqarfittut nalunaarsoqqasalernissaannut siunnersuutit.
  - d. Nuummi pisuttuarterfiit *Udsigten* aamma *Nedskørslen* kalaallisut ateqartinnissaannut siunnersuutit
6. Suliatic allat pillugit ilisimatitsissutit
7. Eqqaasassat allat

Ilanngussaq 1

Ilanngussaq 2

## 1 pillugu

Oqaluuserisassat akuerineqarput.

## 2 pillugu

Kingullermik ataatsimiinnerni imaqarniliat ataani taaneqartut akuerineqarput.

2a. *Februaarip 25-ani 2019, nal. 10.00. Ataatsimiinneq suleriesissamut tunngassutilik.*

2b. *Februaarip 25-ani 2019, nal. 13.00. Ataatsimiinneq nalinginnaasoq.*

## 3 pillugu

### 3a. Strategiliornissamut tunngasunik paasissutissiineq.

Strategiliornissamut suliat sumut killinneri allattoqarfimmit qaapiarlugit paasissutissiissutigineqarput makkuusut:

- Strategiliornermi Nunat Aqqinik Aalajangiisartut allatsigisimasaat killilikkamik peqataasinnaavoq.
- Suliat nunat aqqisa oqaluttuassartaannut tunngasut suliaareersut ingerlaqqissapput.
- Nunat aqqinik katersat katersaasiviullu allattorsimaffiata aqqissuunneqarnissaat.
- Inuit suleqatigisarsimasat aqqi illersorniarlugit allattorsimaffiup allannortinnissaa.
- Nunat aqqisa suussusaasa allattorsimaffiata (genstandsbetegnelsep) tuluttuumut nutserneqarnissaanut isummat siunnersuutillu.

Nunat Aqqinik Aalajangiisartut isumaqarput qulaani taagorneqartut strategiliornermi eqqartorluarneqarumaartut.

### 3b. Aatsitassanut Aqutsisoqarfimmit saaffiginnissut M-76

Nunatat Qeqertarsuarmi marluk Nuussuarmilu ataaseq misissuiffissatut qinnutigineqarsimasut ataatsimut taaguuteqartinneqarnissaat pillugit Aatsitassanut Aqutsisoqarfimmit saaffiginnissutigineqarpoq ulloq 4.marts 2019.

Taakku misissuiffissat allattoqarfimmit ataatsimut ima taaguuserneqarput: *Ivisaannguit.*

Nunaminertat pingasut immikkoortillugit taagorneqassappata siunnersuutinik ima ittunik allattoqarfimmit ilanngussivugut:

Område 1: Ivisaannguit Avannarleq (Ivisaannguit Nord)

Område 2: Ivisaannguit Killeq (Ivisaannguit Vest)

Område 3: Ivisaannguit Kujalleq (Ivisaannguit Syd)

### 3c. Aatsitassanut Aqutsisoqarfimmit saaffiginnissut M-80

Nunatarujussuaq Tunumi Kangerlussuup nalaani misissuiffissatut qinnutigineqarsimasup taaguuteqartinneqarnissaa Aatsitassanut Aqutsisoqarfimmit saaffiginnissutigineqarpoq ulloq 2. april 2019.

Nuna misissuiffissatut qinnutigineqarsimasoq ima taaguuserneqarpoq: *Maattaaligajik*.

### 3d. Aatsitassanut Aqutsisoqarfimmit saaffiginnissut M-82

Nunatat marluk Nuussuarmi Qeqertarsuullu kangiani misissuiffissatut qinnutigineqarsimasut taaguuserneqarnissaannut tunngatillugu Aatsitassanut Aqutsisoqarfimmit saaffiginnissutigineqarpoq ulloq 24.april 2019.

Nunat misissuiffissatut qinnutigineqarsimasut ima taaguuserneqarput: *Qaasersut*.

Nunat marluk immikkoortillugit taagorneqassappata siunnersuutininik ima ittunik allattoqarfimmit siunnersuusiorpugut:

Område 1: Qaasersut Avannarleq (Qaasersut Nord)

Område 2: Qaasersut Kujalleq (Qaasersut Syd)

### 3e. Nunat Aqqinik Aalajangiisartut allattaata Aalborgimut angalasimaneranut paasissutissiineq

Ataani allaqqasut tamarmik ataatsimiinnermi tigussaasunngorlugit qarasaasiaq skærmersuarlu atorlugit ataatsimiinnermi takkullutik peqataasunut allattoqarfimmit takutinneqarput nassuiaatigineqarlutillu.

Nunat Aqqinik Aalajangiisartut allattaat sapaatip akunnerani 15-mi Aalborgimi sulivoq ataatsimiigiarlunilu.

Immap assinginik suliaqarnermi qanoq oqinnerusumik suleqatigiissinnaaneq pillugu ataatsimiinnerit, suleriesissamik misileraaneq kiisalu suliamik aallartitsineq ingerlanneqarput.

Suleriuseq siornatigut ima ippoq: Geodatastyrelsenimit immap assingi saqqummertussat assitut e-mailkkut nassiunneqartarput.

Asseq nassiussaq qarasaasiakkut qanilliseriarlugu assilineqartarpoq, taamaaleriarluni qarasaasiami allaffissiamut (word-imut) aaqqiissutissap allannginnarani asseq assilisaq nuunneqartarpoq.

Nooreeraanni aaqqiissutissaq suup nalaaniinnersoq allanneqartarpoq kiisalu naggataatigut sumiiffippiaa allariarlugu aaqqiissutissaq aatsaat allanneqartarluni.

Aalborgimi misileraareernermit suliamillu aallartitsinermit aallaaveqartumit suleriuseq nutaaq ima isikkoqarpoq:

Suliaqarfik allattoqarfimmit Geodatastyrelsenimiillu suliaqarfigineqartoq ataatsimut ingerlanneqartoq silaannarmiippoq. Imaappoq suliaqarfik ataaseq Oqaasileriffimmit Geodatastyrelsmiillu ataatsimut suliaqarfigineqarpoq. Tassani suliat sumut killinneri qanorlu suliarineqarsimaneri ingerlaannartumik ataavartumillu suliaqartunit tamanit malinnaaffigineqarsinnaapput.

#### **4 pillugu**

##### **4a. Ataatsimiinnermit oktoberip tallimaani 2018-imi ingerlanneqartumit imaqarniliamit tigusat**

4a1. Sannerutip Tasersua (Nassuttooq)

4a2. Tasersuattaq (Nassuttooq)

4a3. Tasersuattaap Kangiutungaani Aasivissuit (Nassuttooq)

Qulaani taaneqartut pillugit Nassuttuumi nunat aqqinik ilisimasalik Angutinnguaq Olsen saqqummiivoq. Saqqummiinnermini Jørgen Inûsugtup KNR-imit immiunneqarnikuunera tigulaariffigalugu nunat aqqi qulaani taaneqartut sumiiffii eqqortut Angutinnguamit nassuiaassutigineqarput.

Jørgen Inûsugtup Hans Holmimit apersorneqarsimavoq ukioq 1980-mi, taannalu aallakaatitassaq KNR radio aqqutigalugu arlaleriarluni aallakaatinneqarnikuulluni.

Angutinnguup saqqummiussinera naapertorlugu allattoqarfimmit siunnersuutigineqarpoq nunat aqqi qulaani taaneqartut Jørgen Inûsugtup oqaluttuarnera malillugu inissinneqassasut.

Nunat Aqqinik Aalajangiisartut aalajangerput nunat aqqi pineqartut sumiiffiit eqqortunut nuunneqassasut. Aalajangiinnermini tunngavigaat sumiiffiit inuisa atuisarneri ataqqisassaasut taamaattumillu allanneqarneri allanngortinnagit Jørgen Inûsugtup oqaluttuarnera malillugu kiisalu Angutinnguaq Olsenip saqqummiinera malillugit inissinneqassasut.

Aalajangiinnginnermi eqqartorneqarpoq Tasersuattaq Tasersuatsiamik allanneqartassanersoq. Tassanili sumiiffiit inuisa nunat aqqinik atuisarnerat malillugu allanneqartarnissaa aalajangiuppaat, taamaattorli Tasersuattaap paasissutissartaani ungaluuserlugu Tasersuatsiaq allanneqassasoq aamma aalajangiuppaat.

Nunat aqqi pineqartut ilaata Tasersuattaap sumiiffianut eqqortumut nuunneqarnerani taseq pineqartoq marlunnik ateqalerpoq imaattunik: **Tasersuattaq** aamma **Naloraariaq**.

**Naloraariaq** pillugu Nunat Aqqinik Aalajangiisartut tullissaani ataatsimiinnissaminut piumasaraat allattoqarfimmit Naloraariaq misissorneqassasoq.

#### 4b. Ataatsimiinnermit februaarip 25-ani 2019-imi eqqartorneqartut

##### 4b1. Kangersertuaq Gletsjer

Kingullermi ataatsimiinnermi Nunat Aqqinik Aalajangiisartut paasiniagassanngortippaat qallunaatut oqaaseq *gletsjer* tunumiusut qanoq taaneqartarnersoq.

Allattoqarfimmit paasisat assigiinngitsut ima inerneqarput:

*Gletsjer* tunumiutut assigiinngitsunik taaneqartarpoq: 1. *Maniitsilertsarpi* (Ilulissanik maniitsunik piiasartooq), 2. Sermersuaq: *Apuseeq*, 3. Uukkaavia (uninnani nakkaajuartoq): *Kattilertarpi*, uani oqaatsip aallaavigaa *kattiit* tassaasut kassuit.

Tunumi Kangersertuaq Gletsjer Kangerlussuup qinnguaniittoq kalaallisut qanoq ateqarnissaanik misissuineq sulii ingerlaqqissasoq Nunat Aqqinik Aalajangiisartut aalajangiipput.

Misissuinerup ingerlaqqinnissaanut allattoqarfimmit paasiniarneqartussat tassaapput:

Kangersertuup qinnguani uukkaaviit ilulissanik qanoq angitigisunik uukkaatitsisarnersut, qanoq ittunik sikuliortarnersut taakkulu assigiinngitsunik tunumiusut ateqartinneqarnersut.

##### 4b2. Kuuttartorsuasik (Eqalugaarsuit)

Kingullermi ataatsimiinnermi paasiniagassatut aalajangiussaq tassaavoq qulakkeerneqassasoq Kuuttartorsuasik kangerluunani qoornortaanersaq.

Paasiniaanermi inuit marluk Eqalugaarsummiut paasiniaavigineqarput. Tamarmik immikkut nassuiaapput kangerluk namminermini ateqartinneqanngitsoq, kisiannili ulinnerani tininneranilu sarfaq malillugu kangerluup iluani tasinngortaartoq kuuttartorsuarmik. Taanna kuuttartorsuaq nerukitsunnguuvooq.

Nunat Aqqinik Aalajangiisartut aalajangerpaat nunap aqqa Kuuttartorsuasik katersani qoornortanngortinneqassasoq kangerluujunnaarluni.

#### 4b3. Taqqa Nuna (Saarloq)

Kingullermi ataatsimiinnermi qulakkiigassatut allattoqarfimmut suliakkiutigineqarpoq ilumut nunap aqqa pineqartoq ilisimaneqannginnersaq.

Katersat malillugit Taqqa Nunaata sumiiffia tassaavoq Orsuusivinniit Uperniviuup tungaanut ingerlaarluni saneqquttariaq qeqertaasaq.

Allattoqarfimmit Saarlormiut sisamat ukiumikkut assigiinngiartumik inissisimasut paasiniaaffigineqarput, tamarmillu immikkut nassuiaapput Saarlup eqqaani nunap aqqa pineqartoq atorineqartillugu tusarsimanagu ilisimanagulu.

Nunat Aqqinik Aalajangiisartut allattoqarfimmit siunnersuutigineqartoq malillugu aalajangiipput nunap aqqa pineqartoq katersaniiginnartinneqassasoq, kisiannili nassuiaaserneqassalluni nunap aqqa ilisimaneerussimasaq.

#### 4b4. Akunnaarmiut (Saarloq)

Kingullermi ataatsimiinnermi qulakkiigassatut allattoqarfimmut suliakkiutigineqarpoq ilumut nunap aqqa pineqartoq ilisimaneqannginnersaq.

Katersat malillugit Akunnaarmiut sumiiffigivaa qeqertaq Qaarusuk. Tassani qeqertami katersat malillugit Akunnaarmiut iterlaavoq. Qaarusummi kimmu Inussuup tungaanut isikkivilimmiippoq Aleqiammiut kujataatunginguani.

Allattoqarfimmit Saarlormiut sisamat paasiniaanermi attavigineqarput. Tamarmik Qaarusummi nunap aqqa pineqartoq tusarsimanngilaat ilisimanagulu.

Nunat Aqqinik Aalajangiisartut allattoqarfimmit siunnersuutigineqartoq malillugu aalajangiipput nunap aqqa pineqartoq katersaniiginnartinneqassasoq, kisiannili nassuiaaserneqassalluni nunap aqqa ilisimaneerussimasoq.

#### 4b5. Sisussat (Arsuk/Ilorput)

Kingullermi ataatsimiinnermi aalajangiunneqarpoq nunap aqqa pineqartoq allattoqarfimmit misissoqqinneqassasoq. Allattoqarfimmit Arsummi najugalimmik attavigineqarnikup saniatigut Nunat Aqqinik Aalajangiisartut namminneerlutik inunnik saaffigineqarsinnaasunik marlunnik taasipput, kiisalu Julius Jakobsenip atuakkiaa *Taamani Taamaassimapput* (2005) innersuullugu misissorneqarsinnaasoq qimerloorlugulu nunap aqqa pineqartoq taakkartorneqarsimanersoq.

Nunat aqqisa allattorsimaffianni katersaniittuni paasissutissat malillugit Sisussat sumiiffippiaanut allattoqarfimmi inissinneqarnikuuvoq, taamaakkaluartoq misissueqqinnerit qulakkeerinninniarnerrillu ingerlanikuupput.

Katersat malillugit nunap aqqata pineqartup sumiiffippiaa tassaavoq kangerlummi Ilorput-mi Taateraarunnerit Tunuanniit ilummut Sermip tungaanut ingerlaarluni nalaagassaq. Tamassuma nalaani nunat aqqinik allanik nalunaarsugaqanngilaq. Nunap aqqata suussusaa genstandsbetegnelset malillugit tassaavoq sisuat.

Paasiniaanermi paasisat aallaavigalugit nunap aqqa pineqartoq inunnit allattoqarfimmit saaffigineqartunit ilisimaneqanngilaq.

Allattoqarfimmit saaffigineqartut ilaata sianerluni paasititsinera ima isikkoqarpoq: Sumiiffiup allattoqarfiup pigisaaneersup akerluinnaani sisuaqarpoq. Sisussat sumiorpaluuteqarpalummat taanna atorneq ajorpaat.

Atuakkami *Taamani Taamaassimapput*-mi Sisussat imaluunniit Sisuat taaneqanngilaq.

Misissuinermi Det Kongelige Bibliotekip nittartagaa ilanngullugu allattoqarfimmit misissuiffigineqarpoq. Tassani nunat assitoqai nutaanngitsut 1860-1900 missaanneersut misissuiffigerani Sisussat imaluunniit Sisuat ilanngilaq.



Allattoqarfimmit sianerluni paasiniaanermi kingullermi utoqqaap Arsummeersup nassuiaanera ima isikkoqarpoq: Sisussat imaluunniit Sisuat nunap aqqatut tusarsimangilai. Qangaanerusoq Sermip sinaava silarpasinnerujussuunikuuvoq taamaattumik ilimaginngilaa qangaanerusoq Sermip sinaava silarpasinnerugallarmat sumiiffiup pineqartup nalaani angalasoqartarsimanissaa.

Paasisat aallaavigalugit allattoqarfimmit siunnersuutigineqartoq malillugu Nunat Aqqinik Aalajangiisartut aalajangiipput nunap aqqa pineqartoq katersani sumiiffimminiiginnassasoq, kisiannili nassuiaaserneqassasoq ilisimaneqanngitsutut.

## **5 pillugu**

### 5a. Nassuttuumi nunat aqqi nalunaarsukkat nutaat

Nunat aqqi nalunaarsukkat nutaat ataani taaneqartut pillugit Angutinnguaq Olsen saqqummiivoq. Nunat Aqqinik Aalajangiisartut Angutinnguup saqqummiineri malillugit nunat aqqi nalunaarsukkat nutaat akuerivaat.

Nalunaarsuineq ingerlanneqarpoq februaarip 21-ani 2019-imi ingerlanneqarpoq, tassani nalunaarsuineri ilaatigut Angutinnguaq Olsen allanik marlunnik ilagisaqarluni aamma peqataavoq.

5a1. Qorlortuarsuup Nuua (NÆS)

5a2. Qorlortuarsuup Qaqqaa (FJELD)

5a3. Kaatorissat Qaqqaat (FJELD)

5a4. Paarnat Nuuat (NÆS)

5a5. Iggiaa (ELV)

5a6. Eqalummiut Tupersuai (NÆS)

5a7. Qorlornera (VANDF)

5a8. Tuttut Puungutaat (FJEGR)

5a9. Qinnguttarfik (FJESI)

5a10. Aasivik (NÆS)

5a11. Aaggaalip Qaqqaa (FJELD)

### 5b. Aasianni (Saqqarleq) nunap aqqa nalunaarsugaq nutaaq

Nunap aqqa nalunaarsugaq nutaaq ataani taaneqartoq (5b1-mi taaneqartoq) pillugu Angutinnguaq Olsen saqqummiivoq.

Nunat Aqqinik Aalajangiisartut Angutinnguup saqqummiinera malillugu nunap aqqa nalunaarsugaq nutaaq akuerivaat.

Nalunaarsuineq ingerlanneqarpoq februaarip 21-ani 2019-imi ingerlanneqarpoq, tassani nalunaarsuineri ilaatigut Angutinnguaq Olsen aamma peqataavoq.

5b1. Kussangajaarsuaq (SKRÅN)

5c. Savaateqarfiit nalunaarsuutitsinni (genstandsbetegnelsen) illoqarfiit nunaqarfiillu assigalugit inoqarfittut nalunaarsorneqalernissaannut siunnersuutit

5c1. Februaarip 19-ani Asiaq-mit piumaneqarput savaateqarfiit allattorsimaffiat katersatsinniittoq. Katersani savaateqarfiit ilisarnaatigaat BYGDA – tassa nunat aqqisa suunerinik nalunaarsuutitsinni toqqammavigalugit atortakkatsinniittoq (genstandsbetegnelsen).

Taakkunani BYGDA ima nassuiarneqarpoq: ”BYGDA Bygd anden (Fåreholdersted o. l.) Nunaqarfik alla (savaateqarfik assingusorluunniit)”. Allaqqanera naapertorlugu savaateqarfiinnaanngitsunut aammali allanut assingusunut nalunaarsuutitut atorineqarsinnaavoq.

Taamaattumik genstandsbetegnelset aallaavigalugit savaateqarfiit assigisaallu tamarmik BYGDA-mi ataatsimoorlutik allaqqapput. Assersuutitut Upernaviup avannaaniittoq *Ikerasaarsuk* tassaavoq nunaqarfiup Nutaarmiut-p ilaa. Assersuutitut aamma taaneqarsinnaasut tassaapput Tunumiittut siullertut Kangertittivaq. Taanna tassaavoq ukiiffigineqartarnikuusimasoq. Aappaattut Qernertivartiit, taanna inuerunnikuuvoq. Taamaattumik savaateqarfiit immikkut nalunaarsuutitsinni nalunaarsorneqalernissaat allattoqarfimmit siunnersuutigineqarpoq.

Allattoqarfimmit siunnersuutigineqarpoq savaateqarfimmit BYGDA atorunnaarlugu AVLSTED imaluunniit GÅRD atulissasoq imalu nassuiaatitaqartinneqassasoq: Avlested/Gård. Kalaallisut nassuiaataa ima nassuiarneqassaaq: Nersutaateqarfik.

Nassuiaatitaani uumasut aalajangersimasut taamaallaat taanagit, kisiannili uumasuuteqarfiit assigiinngitsut taasariallit ataatsimut inoqarfittut taaguusernissaat Nunat Aqqinik Aalajangiisartunit aalajangiunneqarpoq.

Ataatsimiinnermi aalajangiussaq malillugu tunngavilersuinertalerlugulu Nunat Aqqinik Aalajangiisartunit Oqaasiliortunut akuerisassanngorlugulu saqqummiunneqarumaartoq Nunat Aqqinik Aalajangiisartut allattoqarfimmut suliakkiutigaat.

5d. Nuummi pisuttuartarfiit *Udsigten* aamma *Nedkørslen* kalaallisut ateqartilernissaannut siunnersuutit

5d1. Kommuneqarfik Sermersuumit saaffiginnissutigineqarpoq Nuummi/Nuup eqqaani pisuttartarfiit ulluinnarni *Udsigten*-imik aamma *Nedkørslen*-imik taaneqartartut kalaallisut qanoq ateqarnersut.

Katersatsinni kalaallisut qallunaatullu allattoqarfimmi nalunaarsugaatigineqanngillat, taamaattumik misissuinerup ingerlasimanera ima isikkoqarpoq:

Inuit sisamat ilaatigut Nuummiutoqqat aammalu timersornermik pinngortitamiinnermillu nuannarisallit saaffigineqarput. Taamaakkaluartoq paasiniaaffigisassat allat marluk uunga ataatsimiinnermut piareersarnermi pissarsiassaanikuunngitsut akissutissaat Nunat Aqqinik Aalajangiisartut tusaqqaarusuppaat, taamaattumik maanna suliaq aalajangiiffiginagu tulliani ataatsimiinnissamut misissoqqitassatut allattoqarfimmut suliakkiutigivaat.

## **6 pillugu**

Soqanngilaq.

## **7 pillugu**

Nunat Aqqinik Aalajangiisartut Angutinnguaq Olsen immikkut qujaffigivaat ataatsimiinnermi piffissaqarluni peqataammat. Peqataanermini ilisimasani misissorsimasani lu annguppai nassuiaateqarfigalugillu.

## **Ilanngussaq 1**

4a-mi 1-2-3-mi nunat aqqisa sumiiffiginikuusai:



